

迺復虛和喻精保衛聖躬冀以星斗導之  
雷風

四十四代宗師養素通真明教真人姓王諱  
道孟字牧齋句容人方面豐頤容止莊厲年  
十四師事元符道士沈宗紹不飾偽而行益  
高不求譽而名愈出未四十人以先輩屬焉  
比嗣教朝京師蒙恩敷一如許先生大德戊  
戌歲歲雨至維揚驅蝗請雨大驗特賜號稱  
真人行業見翰林直學士元明善所撰華陽  
道院碑文至大辛亥請老而傳迺命入室弟  
子劉大彬襲其教年七十有三蛻于華陽  
宋寶祐壬寅生人

贊曰養素以朴通真以誠內接玄同外佐  
昇平蜚螭伏藏年穀成遂少見其微已足  
名世

四十五代宗師<sup>師一</sup>洞觀行妙玄應真人姓劉名  
大彬號王虛子吳郡錢唐人延祐四年得九  
老仙都君玉印有司聞于朝仁宗皇帝特旨  
還賜宗壇以傳道統

贊曰山嶽昂藏湖海浩湯玄微備至植宗

華陽承光紫闕教賜朱方九老都君錫爾  
寶章

茅山志卷之十二

正一天師清微弟子 洪百堅 製作

道教學術資訊網站

茅山志卷之十三<sup>十四</sup>

開卷

師二

仙曹署篇

華陽洞天三官五府曰易遷宮合真宮蕭閑  
官曰太元府定錄府保命府童初府靈虛府  
其太元定錄保命為三茅君所治易遷合真  
則女子成道者居之餘官府皆男真也保命  
間用女官東海青童君一年弄游校此諸官  
觀見羣輩

前司三官保命真人

郭四朝真人燕國人也兄弟四人秦時居伏  
龍之地並得道四朝是長兄真法其司三官  
者六百年無違坐超遷之四朝職滿上補九  
官左仙公領玉臺執蓋郎中聞久缺無人後  
以茅小君代四朝耳

定錄府<sup>師二</sup>左右理中監

定錄官僚有左右理中監準世長史司馬職  
又有北河司命主水官考此三職常領九宮  
禁保侯職主領應為種民者洞宮自二君而  
下便次此三職為大矣

左理中監準大府長史昔用韓崇以居之崇  
字長季吳郡毗陵人少好道林屋仙人王瑋  
玄曾授之以流珠丹一法崇奉而修之大有  
驗瑋玄語之子行此道亦可以出身仕宦無  
紡仙舉也崇遂積仕至宛陵令遷汝南太守

秩中二千石在郡積十一年化政治著舉天  
下最年七十四瑋玄迺授以隱解法得去入  
大霍山復受瑋玄遁化泥丸紫戶術以度世  
來在洞中也漢書有傳

右理中監準職如司馬有劉翊字子翔者居  
之漢書作字子相翊本潁川人少好道德常  
能周施而不以為惠死救窮非一人矣舉  
上計掾拜郎中遷陳留太守遇馬皇先生告  
翊曰子仁感天地陰德神鬼太上將嘉子之

用情矣使我來携汝以長生之道翊叩頭自  
搏乞願侍給因將入桐栢山中授以隱地入  
術服五星之華法得度名東華受觀洞中也

北河司命  
北河司命須闕無人昔以姚俊兼之耳俊錢  
唐人受業太學明經術災異曉為交趾太守

漢末棄世入增城山中學道遇東郭幼平幼  
平秦時人久隱增城得道者也教俊行九精  
鍊氣輔星在心之術修之道成來洞中兼北  
河司命主水官之考罰此位雖隸定錄其實  
受事於東華宮中節度姚俊字翁仲者也隱

居曰有塚在錢唐臨平墳壇歷然苗裔猶在  
鄉近時聞輦角之響故人不得侵毀之皆知  
呼為姚司命塚  
張激子河內張泰也字公先少時名激子耳  
棄世入剡山遇山圖公子授棟玉法修之得

道進東華宮行當為太極仙侯或領九宮尚  
書與北河侯對職治水考北河司命或為禁  
保侯亦并共業故也治在洞天之中

定錄府典柄執法郎  
淳于斟字叔顯主試有道者對會稽上虞人  
漢桓帝時徐州縣令少好道明術數服食胡  
麻黃精餌後入吳烏目山中隱居遇仙人慧  
車子授以虹景丹經修行得道職任洞中

保命府明晨侍郎  
保命府多女官司三官官屬有七人四女三

男明晨侍郎七人如今世上御史中丞之職  
並隸東華方諸官保命君總關之周爰爰者  
漢河南尹周暢字伯持之女也暢汝南安城  
人好行陰德功在不覺永初二年夏旱收葬  
洛陽城旁客死骸骨萬餘人為立義塚祭祀

之應時大雨豐收所行多類此陰行聞于太  
上令爰爰從南宮受化得仙來在洞中爰爰  
少亦好道服茯苓三十年後遇石長生教以  
化遁化遁上尸解也隱居云暢周嘉從弟也  
瑒帝時為河南尹至光祿勳

張桃枝漢司隸校尉朱寓季陵母也寓母行  
陰德久聞在易遷始得為侍郎耳隱居云朱  
寓沛人桓靈時八俊  
夏馥字子治陳留人也少好道服術餌和雲

母後入吳山從赤須先生受鍊靈法又遇桐  
栢真人授以黃水雲漿法得道來在洞中馥  
少時被公府辟召懸壁書著桑樹廷去其用  
懷高邁如此隱居云後漢及高士傳並云馥

陳留國人桓帝時舉直言不就真誥云例皆  
取平真正直體隱神清即侍郎之才不限男

女也餘數人不能一一道之

保命府理禁伯

張去賓定襄人也魏武帝時舉茂才歸鄉里師事西河劉公受服術餌兼行洞房白元之事後遇真人樊子明於少室峻以適變隱景之道昔在天柱山後來華陽內為理禁伯理禁伯者主雨水官也亦保命之監國也玄賓善談空無迴談士常論無者大有之宅小有所以生焉積小有以養小無見大有以本大無有有亦無焉無無亦有焉所以我目都不見物物亦不見無寄有以成無寄無以得無於是無則無宅也太空亦宅無矣我未生時天下皆無無也自云昔曾詣蓬萊左公宋晨生與其論無竊得人蕉桐栢諸真且不能折之過此以去尚未能本有安能本無耶其高氣乘理如此

保命府丞

趙威伯東郡人也少受業于邯鄲張先生行挹日月之景服九靈明鏡之華晚在中嶽受玉珮金璫經於范丘林丘林迺是漢樓船將

軍衛行道婦也河圖云吳楚多有人得見太平者常語人云此言不虛此驗不久其所存明鏡非世間常法得道來在華陽內為保命丞保命有四丞趙主仙籍及主暴雨水領五芝金玉草欲致洪雨者可將詞詣之也

其一丞是咸陽樂長治東鄉司命君鄉呈人也為茅小君所舉用漢桓帝中書侍郎晚從中嶽李先生受步七元法得仙長治主災害其一丞是孟君入室弟子鄭雅正也孟君所屬用鄭主考注

其一丞是西山唐公房蜀人奉事李八伯者也唐主生元周氏玄通記黃元平東海人年可三十許白布袴褶平上幘執手版版黑色散在保命趙丞間無位任

河內李整昔受守一法并行洞房得道初在陽洛山後來入華陽中又主諸考崇民間之事整往嘗為常道鄉公傳受道入山時已年六十隱居云整居四平山及大茅東採石脂服之得道今猶有採處

周子良字元赫內諱太玄字虛靈永嘉人隱居高第弟子也拱命降真以梁天監十四年十月二十七日白日尸解時年二十隱居檢集平日真降事迹類為四卷進之武皇帝即周氏玄通記也記中載二君選為保籍丞此位起始立以助領諸簿錄其任數小而高清為美後當度名東華更奏上位為保展司知天下神仙功夫之事教學之方也

保命府鬼帥

王延傳元范強徐衛此四鬼帥本亦道家之祭酒也得下解法受書為鬼帥耳

華陽洞玉童

周氏玄通記華陽之天司晨玉童姓景名上期

蕭間宮仙人

周氏玄通記蕭間宮仙人張子安芙蓉冠絳繡衣侍者三人子安名孝榮陽樂井人也

童初府上帥

劉文饒弘農劉寬也年七十三一旦遇青谷先生降之寢室授其杖解法將去入華山行

九息脈氣又授以爐火丹方修之道成後末洞中主始學道者寬任漢位至司徒太尉好行陰德拯疾困萬民悅而附之如父母焉漢書有傳

童初府監

范初冲遠西人也受太素胎化易形之道常旦旦存青白赤三氣各如縱從東方日下直入口中抱之九十過自飽便止行之十年得道其法約其事驗太素秘道也范監者即其人也昔為童初監今在華陽中

童初府仙人

童初府有王少道范叔勝李伯山皆童初之標者少道漢時人王遜兒也遜漢時山陽太守范叔勝北地人也魏文帝黃門郎李伯山李冲父也冲漢時為白馬令行陰德或積世有道仁行所鍾此之仙人皆一進再進得入此府未必盡徑來也

三官大理

范帥云三官有獄官不名廷尉名大理李豐今為大理都餘一守缺以擬王附子不以與

許虎也隱居云李豐字安國改字宜國馮翊人李義子本寒微有才志遂仕魏為尚書僕射大理即古之獄官前漢洎魏時廷尉亦名大理此職是仙官也王附子是王之之小名許虎即虎牙也

地下主者

鮑靚字太玄陳留人也仕晉累徵為黃門侍郎出為南海太守洞監幽玄學通經緯人莫知之師左元放受中部法及三皇內文能役使鬼神封山制魔復於蔣山遇真人陰長生授刀解之術按真誥靚及妹並是七世祖積行陰德故令福逮於靚等今並作地下主者在洞宮中靚所受學本自薄淺質又澆滯故不得多也隱居云鮑用秦清尸解法當是主者之最高品矣靚女鮑姑散騎常侍葛洪之妻也姑與稚川亦相次登仙有鮑姑艾曾灼龍女見別傳

茅山志卷之十三

茅山志卷之十四

上清嗣宗師刻大彬造

仙曹署篇

易遷宮仙人

易遷館舍真臺皆宮名也易遷中都有八十三人又有偽辰夫人者九宮之真女也太上往還來教此算法皆以保命授書偽辰夫人主敬領之也夫人漢司空黃瓊女黃景華也師韓終授以岷山丹服之得仙趙素臺者在易遷中已四百年不肯徙自謂

天下無復樂於此處也素臺是趙熙女漢時熙為幽州刺史有濟窮人功河中救王惠等族誅行陰德數十事故其身得詣朱陵兒子並在洞天中熙恒出入定錄府素臺數徵服游行道巷野山澤以自足矣玄通記云易遷領學仙妃趙夫人字素臺年三十餘綠繡衣易遷中有高業而蕭條者有寶瓊英韓太華劉春龍王進賢李奚子郭叔香此數人並天姿辯秀清澄眇邈才文橫勝儀觀駭眾此則主者之高華仙官之奇才其次及得張養子